

Evening Dogri (NSD)

14-05-2024

खबरां :-

1. लोकसभा चुनां दे 7में ते खीरी गेड़ लेई नामांकन दाखल करने दा समां अज्ज मुक्की गेआ।
2. बीजेपी दे सीनियर नेता ते प्रधानमंत्री नरेंद्र मोदी होरें अज्ज वाराणसी थमां अपना नामांकन भरेया।
3. निर्वाचन आयोग नै आदर्श आचार संहिता दी खलाफवर्जी सरबंधि 90 प्रतिशत शकैतें दा नबेड़ा करी दित्ते दा ऐ।
4. केंद्र सरकार नै LTTE पर लाई गेदी बंदश गी होर 5एं बरें लेई बधाई दित्ता ऐ।
5. राम चरित मानस, पंचतंत्र ते सहृदय लोक-लोकन गी यूनेस्को दे विश्व एशिया प्रशांत क्षेत्रीय अनुस्मरण रजिस्टर च शामिल कीता गेआ ऐ।
6. मौसम विभाग नै 18 मई तगर पच्छमी राजस्थान ते दक्खन भारत दे केई इलाकें च जबरदस्त गर्मी पौने दे आसार दस्से ना।
7. आई.पी.एल च अज्ज दिल्ली दे अरूण जेटली स्टेडियम च दिल्ली कैपिटल्स दा मकाबला लखनऊ सुपर जायंट्स कन्नै।

<><><><><><>

7th Phase Nomination

लोकसभा चुनाएं दे 7में ते खीरले मरहले लेई नामांकन भरने दा अज्ज खीरी ध्याड़ा हा। 7एं राज्यें ते इक्क केंद्र शासित प्रदेश दी 57एं लोकसभा सीटें उप्पर इस गेड़ च मतदान होग। इंदे च 13-13 सीटां उत्तर प्रदेश ते पंजाब दियां, 1 पच्छिम बंगाल दी, 8 सीटां बिहार दियां, 6 ओडिशा दियां, 4 हिमाचल प्रदेश, त्रै झारखंड ते इक सीट केंद्र शासित प्रदेश चंडीगढ़ दी शामिल ऐ। कागजें पत्तरे दी जांच पड़ताल कल होग ते शुक्रवार नामांकन वापस लैने दा खीरी ध्याड़ा होग। इस गेड़ लेई मतदान पैहली जून गी होग।

<><><><><><>

PM-Nomination

बीजेपी दे लीडर ते प्रधानमंत्री नरेंद्र मोदी होरें अज्ज वाराणसी चुनांस हल्के थमां अपना नामांकन भरेया। इत्थे 7में ते खीरले मरहले च मतदान होग, अज्ज नामांकन भरने दा खीरी ध्याडा हा। कागज पत्तर भरने थमां पैहले मोदी होरें गंगा च चलोब्बी लाई ते फही काल भैरव मदरें च मत्था टेकियै शीरवाद लैत्ता, जिनेंगी काशी दा कोतवाल आखेआ जंदा ऐ। इस मौके उंदे कन्नै सैहयोगी दलें दे केई नेता ते गठबंधन साथी मजूद हे जिंदे च चंद्र बाबू नायडू, एकनाथ शिंदे, जतिन राम मांझी, संजय निशाद ते रामदास अठावले वगैरा शामिल हे। बीजेपी दे नेताएं च राश्ट्री अध्यक्ष जे.पी.नड्डा, रक्षा मंत्री राजनाथ सिंह ते हरदीप सिंह पुरी होर बी उन्दे कन्नै हे। उंदे नां दी चऊ प्रस्तावकें, प्रस्तावना कीती जिंदे च पंडित ग्यानेश्वर शास्त्री, बैजनाथ पटेल, लाल चंद खुशवाहा ते संजय सोनकर शामिल हे। कांग्रेस दे अजय राय जेह्दे आई.एन.डी.आई. गठबंधन दे सांझे मेदवार न ओहू मोदी हुंदे खलाफ चुनां मैदान च ना राय होर यू.पी कांग्रेस दे अध्यक्ष न, उनेंगी 2014 ते 2019 च बी मोदी हुंदे खलाफ वाराणसी थमां मैदान च तुआरेया गेआ हा पर ओहू दौनें बारी त्री थाहरा उप्पर रेह हे। 2019 च प्रधानमंत्री मोदी होरें समाजवादी पार्टी दी मेदवार शालिनी यादव गी 4 लक्ख 79 ज्हार वोटें कन्नै हराया हा।



ECI-Complaints

निर्वाचन आयोग नै आखेआ ऐ जे ओह्दी तरफा आदर्श आचार संहिता लागू होने दे बाद हासल शकैतें चा 90 प्रतिशत कोला मतिएं दा नबेडा करी दित्ता गेदा ऐ ते कांग्रेस ते बीजेपी गी छोड़िए होर कुसै पार्टी दी कोई बड्डी शकैत बकाया नेई ऐ। अज्ज जारी इक्क बयान च आयोग नै आखेआ ऐ जे बक्ख-बक्ख सियासी पार्टिएं ते मेदवारें 425 प्रमुख शकैतां दर्ज कराइयां न जिंदे चा 400 दा नबेडा करी दित्ता गेदा ऐ। इंदे चा 170 कांग्रेस, 95 बीजेपी दियां ते 160 शकैतां होरनें पार्टिएं दियां न।



4th Phase

श्रीनगर दे गांदरबल, पुलवामा, बडगाम ते शोपियां जिले च कल 37 इशारिया 9-9 फीसद शानदार मतदान दर्ज कीता गया। 2019 बरे च होए दे लोकसभा चुनाएं च 14 इशारिया 4-3 फीसद मतदान होएया हा। चौथे मरहले दे मतदान दा ब्यौरा दिंदे होई मुख् चुनांs अधिकारी पी.के पोले होरें आखेआ जे इस बारी दे चुनाएं च नांs ते कोई बहिष्कार दा आह्वान हा ते नां गै कुसै मतदान केंद्र उप्पर जीरो मतदान दर्ज कीता गया। उनें मती गिनतरी च होए दे मतदान दा श्रेय सुधरी दी सुरक्षा स्थिति ते लोकें च पैदा होए दे बसाह-भरोसे गी दित्ता।



UNESCO-India

भारत दी सरोखड, साहित्यक ते सांस्कृतिक विरासत दी पुष्टि करदे होई रामचरित मानस, पंचतंत्र ते सहृदयलोक-लोकन गी युनेस्को दे विश्व एशिया प्रशांत खेत्तरी अनुस्मरण रजिस्टर च शामिल कीता गेआ ऐ। संस्कृति मंत्रालय नै आखेआ ऐ जे इनें पुस्तकें गी रजिस्टर च शामिल करना इक बडे मात्रै आहली गल्ल ऐ। विश्व स्तर उप्पर देश दी सरोखड साहित्यिक ते सांस्कृतिक विरासत दे संरक्षण दी पेठा होआ'रदी कोशिशें गी होर अगगे लेई जाने दा प्रतीक ऐ। एहू स्हाडी सांझी मानवता गी आकार देने आली बक्ख-बक्ख कथाएं ते कलात्मक अभिव्यक्तियें गी पंछानने ते सुरक्षित रखने दे महत्व उप्पर लौ पांदा ऐ। इनें उच्चे दर्जे दी साहित्यक कृतियें दा सम्मान करियै समाज ना छड्डा श्रद्धा-सुमन भेंट करदा ऐ, बल्कि औने आहिलियें पीढियें गी प्रेरणा देने आली रचनाएं दा संरक्षण बी करदा ऐ।



LTTE-Ban

केंद्र सरकार नै लिबरेशन टाइगर्स ऑफ तमिल ईलम पर लाई गेदी बंदश गी होर 5एं बरें तगर बदाई दित्ता ऐ। गृह मंत्रालय नै जारी इक अधिसूचना च आखेआ ऐ जे भारत दी सम्प्रभुता ते क्षेत्रीय अखंडता लेई खतरा पुजाने आली LTTE दिएं गतिविधिएं गी दिक्खदे होई केंद्र सरकार नै एहू फैसला लैता ऐ।



IGNCA-Tagore

इंदिरा गांधी राष्ट्रीय कला केंद्र नमीं दिल्ली च नोबेल पुरस्कार विजेता गुरुदेव रविंद्र नाथ टैगोर हुंदिं फोटुएं ते पेंटिंग्स दी नमैश लाई गेदी ऐ जेदे च रविंद्र नाथ टैगोर हुंदे जीवन दे महत्वपूर्ण पलें दियां फोटुआं ते उंदे आस्सेआ तैयार कीती गेदी चित्रकारिं दे नमूने रक्खे गेदे ना। एहू नमैश 10 दिने तोड़ी चलोग ते जनपथ नमीं दिल्ली दी इस आर्ट गैलरी च लोक बिजन कोई पैहा दित्ते दे बड्डुलै 10 बजे कोला लेइए 5 बजे तोड़ी दिक्खी सकदे ना।



PoK-Violence

पाकिस्तान दे नजैज कब्जे आले जम्मू-कश्मीर च सुरक्षा बलें कन्ने लग्गी दिं स्ट्रफ्फें च 100 कोला मते लोक घायल होए देन ते इक पुलसकर्मी समेत 4 लोकें दी जान बी चली गई ऐ। पिच्छले शुक्रवार थमां प्रदर्शन करा रदे लोक बिजली पर टैक्स माफ कने ते रिआयती भाएं पर आटे दी मंग करा करदे ना। मकबूजा कश्मीर गी पाकिस्तान नै अजाद कश्मीर नां देई दित्ते दा ऐ-पर उत्थूं दे लोक मतिं परेशानिं दा सामना करा करदे ना। हालात मते खराब होने पर उत्थे बजार, स्कूल, दफतर सब्ब बंद न ते दफा 144 नाफस करी दित्ती गेदी ऐ ते मोबाइल नेटवर्क बी बंद रक्खेआ गेदा ऐ। पाकिस्तान दी मीडिया च बी उत्थूं दिं खबरें गी दबाया जा रदा ऐ।



IMD-Heatwave

भारती मौसम विभाग नै आखेआ ऐ जे अज्ज ते कल कोकण दे बक्ख-बक्ख हिस्सें च जबरदस्त गर्मी जारी रौहने दी मेद ऐ। पच्छमी राजस्थान च कल्लै कोला लेइए शनिवार तोड़ी भारी गर्मी दे आसार ना। उत्तर प्रदेश, पंजाब, हरियाणा ते दक्खनी हिस्सें ते बिहार च बी वीरवार कोला लेइए अगले त्रऊं दिनें तोड़ी जबरदस्त गर्मी पौने दे इमकान च 18 मई तगर मुल्खै दे दक्खनी हिस्से च गर्जी चमकिए बरखा बरी सकदी ऐ।



Cannes

फ्रांस दे कान्स च अज्ज 17मां कान्स फिल्म महोत्सव शुरू होआ'रदा ऐ। भारत बी 12 दिन चलने आहले कार्यक्रम च हिस्सा लै'रदा ऐ। भारतीय प्रतिनिधि दल च भारत सरकार ते राज्य सरकार दे प्रतिनिधि ते फिल्म उद्योग कन्ने जुडे दे लोक शामिल ना। भारत इस महोत्सव च पैहली बारी भारत पर्व दी मेजबानी करा रदा ऐ। फिल्म महोत्सव च भारत पविलियन भारतीय फिल्म जगत लेई बक्ख-बक्ख गतिविधियें च हिस्सा लैने लेई इक्क मंच होग। भारत

पर्व च 55में भारतीय अंतरराष्ट्रीय फिल्म महोत्सव आई.एफ.एफ.आई. दे पोस्टर ते ट्रेलर दा बी अनावरण कीता जाग। आई.एफ.एफ.आई. दा आयोजन 20 थमां 28 नवंबर दे बश्कार गोवा च आयोजित होग।



India-Green

भारत नै पैहली बारी विश्व हाइड्रोजन शिखर सम्मेलन 2024 च अपना मंडप स्थापित कीता ऐ जेड़ा मौजूदा समें च नीदरलैंड दे राटरडैम च चला'रदा ऐ। एहदा उद्घाटन नवीकरणीय उर्जा सचिव भूपेंद्र एस. भल्ला होरें कीता। एह हरित हाइड्रोजन दे क्षेत्र च देश दी प्रगति गी दर्शादा ऐ। शिखर सम्मेलन च विश्व भर थमां 15 ज्हार प्रतिनिधियें दे हिस्सा लैने दी मेद ऐ। भारत नै पिच्छले बरे जनवरी च अपना राश्ट्री हरित हाइड्रोजन दमिशन शुरू कीता हा तां जे भारत 2030 दे अखीर तगर 5 मिलियन मीट्रिक टन दी हरित हाईड्रोजन उत्पादन क्षमता हासल करी सकै।



IPL

आई.पी.एल क्रिकेट च एल्ले दिल्ली कैपिटल्स ते लखनऊ सुपर जायंट्स बश्कार मकाबला जारी ऐ। कोलकाता नाइट राइडर्स दी टीम नै कल प्ले ऑफ लेई क्वालीफाई करी लैता जिसले जे गुजरात टाइटन्स दी टीम बरखा कारण मैच रद्द होने कारण बाहर होई गई ऐ।

